

**Uunga siunnersuut: Tikeraat ornittagaannik takornariartitsivinnillu pilersitsisarneq
ingerlatsinerlu pillugit Inatsisartut inatsisaat nr. xx, xx. xxx 2016-imeersoq**
(Inuussutissarsiornermut, Suliffeqarnermut, Niuernermut Nunanullu Allanut
Naalakkersuisoq)

Saqquummiusissut

(Inuussutissarsiornermut, Suliffeqarnermut, Niuernermut Nunanullu Allanut
Naalakkersuisoq)

Siullermeerneqarnera

Siunnersummi siunertaavoq Namminersorlutik Oqartussat tikeraat ornittagaannik aamma takornariartitsivinnik pilersitsisarnissaannut ingerlatsisarnissaannullu killiliussassanik aalajangersaanissaq.

Nunamut tamarmut takornariartitsinermi periusissiami piffisami 2016-2020-mut atuuttumi taaguuteqartumi "*Takornariartitsinermik Kalaallit Nunaanni ineriaartortitsineq - suut iliuusaasariaqarpat?*" allaaserineqarput periarfissat assigiinngitsut, nunatsinni takornariartitsinerup inuussutissarsiornikkut nappataasut ilaattut inisisimalersinnaaneranut. Takornariartitsinermut periusissiami inassutigineqarpoq tikeraat ornittagaannik aamma takornariartitsivinnik pilersitsiortortoqassasoq, immikkut takornariartartut ornissallugit soqtiginartitaasa eqqaanni, assersuutigalugu ornittakkani Nunarsuarmiut kingornussassaannut UNESCO-p allassimaffiutaani nalunaarsorneqarsimasut eqqaanni.

Tikeraat ornittagaat aamma takornariartitsiviit takornariartunut annertusisamik misigisassarsiornissamut aqqutissiuusseqataassapput, ilisimasanik tunuliaqutaasunik pissanganartumik soqtiginartumillu saqqummiusssarnikkut, sumiiffinni pineqartuni nerisassianik mamartunik ussiinissamut periarfissaqartitsiviusunik, aaqqissuussinerullu tamarmik ilorrisimaarnartumik nuannersumillu ingerlanneqarfingisinnasaannik.

Taamaasilluni siunnersummi ineriaartortitsiniarneq siuarsarneqarpoq, Kalaallit Nunaanni takusarneqarsinnaasut immikkuullarissut soqtiginartullu takornariartunut tikikkuminartunngortinneqarlutik, taamaaliornikkullu takornariartartut ujartortagaat amerlisarneqassallutik. Takornariartut amerlanerusut tikeraat ornittagaasa takornariartitsiviillu orniginarerulernissaat sumiiffinni pineqartuni inuussutissarsiornermi isertitassaqarnerulernermik suliffissaqartitsinerulernermillu kinguneqassapput.

Taamatut oqaaseqarlunga siunnersuut Inatsisartuni suliassanngortippara.